

Wann nun das Pferd die obbemeldten Schulen verstedet/ kan man ihm den Lummel-Sattel/ sampt dem Hindern und Vor-Geräthe aufflegen/ vnd der Reiter die Sporn angürten/ doch solle er das Pferd noch zur Zeit nicht darmit berühren: So dann solle man es in einem weiten Kreis herumb traben/ vnd vnterweilen denselben in der mitte durchschneiden/ auch Anfangs drey oder viermahl auff die rechte Hand/ alsdann auff die Lincke abwechseln/ vnd eben so oft herumb traben/ alsdann auffhalten/ gleich vnd stat stehen machen/ vnd etliche Schritte zurück ziehen. Folgendes solle man wieder vorwärts reiten/ vnd auff der lincken Hand anfangen/ auch eben dieses thun/ was vormals auff der Rechten beschehen: Auff welche Hand man das Pferd wendet/ auff selber soll auch das Nasband etwas kürzer gefasset werden/ damit das Pferd die Wendung inwendig anschawe/ vnd sehe/ wohin es die Füße setze/ vnd was es thue.

Wann man aber gerade hinaus reitet/ sollen die Stränge des Nasbands kurz/ vnd ganz gleich lang genommen werden/ damit das Pferd den Hals biege/ vnd den Kopff stat trage/ doch also daß es ein wenig/ vnd nur mit halbem Aug auff die rechte Hand blicke.

Man kan es auch gerad vorwärts/ vnd oben vnd vnten in einem halben Cirkel reiten/ mit halben vnd ganzen Wendungen/ vnd wann es in dem Wendten ist/ solle man dergleichen thun/ als wann man es halten wolte/ es seye nun im Trab oder Galopp, damit sich das Pferd zusammen fasse/ vnd mit dem Kreuz abwechselte/ alsdann es für sich anfrischen/ vnd darauff die ganze/ oder halbe Wendung beschliessen/ vnd auff solche weiß wird es wol/ vnd wie es recht ist/ gehen.

Das IV. Capitel.

Von denen Posaten oder Hebungen.

Nach denen obbemeldten Schulen/ solle man mit zwey oder drey Hebungen anfangen/ der Gestalt/ dem Pferd sein lind zuschreyen/ vnd ihm mit Schnalzen der Zungen/ vnd Pfeiffen der Spisruthen helffen/ es auch darmit entweder auff die rechte oder lincke Schulter/ wie es am bequemesten seyn wird/ berühren/ und es mit dem Nasband/ vnd Mundstück/ auch dem Wadel der Schenckel etwas vber sich heben/ den Leib aber etwas zurück halten/ daß auff solche weiß wird sich das Pferd mit denen vordern Schenckeln in die Höhe heben. Es ist aber zuwissen: daß solche Hebungen müssen eröfftert/ ziemlich hoch/ leicht vnd geschwind auff einander gemacht werden/ Das ist so bald das Pferd sich in die Höhe hebet/ eben in der zeit muß es sich wieder mit denen vordern Schenckeln auff die Erde niederlassen/ vnd solle man zusehen/ wann das Pferd sich hoch hebet/ daß die vordern Schenckel vnter die Brust gebogen seyen/ auff denen hindern Schenckeln aber soll es stat stehen./ vnd sich fest vnd starck auff denen Hüften/ vnd dem Kreuz halten.

Das